

Na osnovu čl. 9. Zakona o udruživanju građana (Službene novine FBiH, br.6/95) Osnivačka skupština Društva fizičara u Bosni i Hercegovini, na sjednici od 27 novembra 2000.godine, donijela je

STATUT UDRUŽENJA GRAĐANA
DRUŠTVA FIZIČARA U BOSNI I HERCEGOVINI

I OSNOVNE ODREDBE

Član 1.

Ovim Statutom se uređuju: organiziranje, djelovanje i udruživanje fizičara Bosne i Hercegovine, kao udruženja građana, pri čemu se utvrđuje naročito: naziv, sjedište i područje na kojem udruženje djeluje, djelatnost udruženja, svrha i programski ciljevi udruženja, članstvo u udruženju (uslovi i način učlanjivanja, prestanak članstva, te prava, dužnosti i odgovornosti članova udruženja), visina članarine, organi upravljanja udruženja (vrste organa, način njihovog izbora, uvjeti i način opoziva, trajanje mandata, način odlučivanja i odgovornosti); način donošenja odluke o prestanku rada udruženja, finansiranje (način sticanja, korištenja i raspolaganja sredstvima udruženja), javnost rada, pečat i znak (skraćeni naziv i naziv na engleskom jeziku), predstavljanje i zastupanje udruženja, način donošenja statuta i izmjena i dopuna statuta udruženja, kao i druga pitanja od značaja za ostvarivanje zadataka i djelovanja udruženja.

Član 2.

Naziv udruženja je : Društvo fizičara u Bosni i Hercegovini (u daljem tekstu : Društvo), a na engleskom jeziku : Bosnian Physical Society.

Član 3.

Skraćeni naziv Društva je : DF BiH (a na engleskom jeziku: BPS)

Član 4.

Sjedište Društva je u Sarajevu, Zmaja od Bosne 35.

Član 5.

Društvo djeluje na području Federacije Bosne i Hercegovine i šire u skladu sa važećim propisima.

Član 6.

Društvo ima svojstvo pravnog lica i upisuje se u registar kod nadležnog organa.

Član 7.

Društvo može u okviru svojih djelatnosti i programskih ciljeva vršiti izdavačke, uslužne, privredne i druge djelatnosti i ukoliko se pokaže potreba osnovati preduzeće, odnosno pravno lice za obavljanje uslužne, izdavačke, privredne i druge djelatnosti pod uslovima utvrđenim zakonom, kao i vršiti javna ovlaštenja na zakonu zasnovanim odlukama nadležnih organa.

Član 8.

Društvo je samostalno u ostvarivanju ciljeva i zadataka utvrđenih ovim statutom, u skladu sa Ustavom i zakonom.

Član 9.

Pečat Društva je okruglog oblika sa dijametrom kruga od 30 mm u kojem je po obodu kružnice upisano DRUŠTVO FIZIČARA U BOSNI I HERCEGOVINI, a kroz sredinu SARAJEVO.

II PROGRAMSKI CILJEVI I SADRŽAJ DJELATNOSTI DRUŠTVA

Član 10.

Rad Društva zasniva se na Programu rada Društva.
Program rada Društva donosi Skupština Društva.

Član 11.

Programski cilj Društva je da svojom aktivnošću doprinosi:

- ◆ širenju i unapređivanju naučnih i stručnih znanja iz oblasti fizike i njenih primjena u Bosni i Hercegovini;
- ◆ razvijanju izdavačke djelatnosti iz oblasti fizike i s njom povezane problematike te preko svojih publikacija obavještanje domaće i strane javnosti o dostignućima u oblasti fizike i njenih primjena;
- ◆ popularizaciji fizike i otkrivanje talenata za fiziku iz redova učenika osnovnih i srednjih škola te studenata visokoškolskih ustanova u Bosni i Hercegovini;
- ◆ zaštiti profesionalnih interesa članova Društva.

Član 12.

Djelatnost Društva sastoji se u izražavanju i ostvarivanju naučnih, stručnih, obrazovnih i profesionalnih potreba i interesa u domenu fizike i njenih primjena radi zadovoljavanja zajedničkih interesa i vršenja određenih poslova i javnih ovlaštenja na zakonu zasnovanim odlukama nadležnih organa.

Član 13.

Primarne djelatnosti Društva su:

- ◆ unapređenje, razvoj i omasovljenje Društva;
- ◆ podizanje nivoa stručnih i naučnih znanja članova Društva organiziranjem stručnih i naučnih predavanja, seminara, savjetovanja, simpozija, razgovora, takmičenja učenika osnovnih i srednjih škola, organiziranjem posebnih priprema za takmičare i učesnike na olimpijadama, izdavanjem stručnih publikacija i drugim oblicima javnih komunikacija;
- ◆ predlaganje nadležnim organima nastavnih planova i programa iz oblasti fizike kao i podizanje svih vidova stručne spremlje nastavnog kadra iz fizičkih nauka;
- ◆ organiziranje svih vidova stručnog usavršavanja i obrazovanja iz oblasti fizike;
- ◆ izdavanje, u okviru vlastite izdavačke djelatnosti, časopisa, udžbenika, priručnika i drugih publikacija u skladu sa Zakonom.
- ◆ pružanje i drugih usluga iz oblasti fizike i njene primjene, kao i vršenje odgovarajućih uslužnih djelatnosti, neophodnih za ostvarivanje programskih ciljeva Društva, u skladu sa Zakonom.
- ◆ ostvarivanje saradnje sa srodnim društvima i institucijama u zemlji i inostranstvu, u skladu sa Zakonom.

III ČLANSTVO DRUŠTVA

Član 14.

Članstvo u Društvu je: redovno i počasno.

Redovni članovi mogu biti svi fizičari Bosne i Hercegovine, a to su nastavnici fizike u osnovnim školama, profesori fizike u srednjim školama, nastavnici i saradnici iz oblasti fizike na višim školama i fakultetima (visokoškolskim ustanovama), lica koja su završila I i/ili II stepen studija fizike svih usmjerenja, magistri i doktori nauka iz fizike, kao i studenti studija fizike i svi ostali građani Bosne i Hercegovine koji prihvataju Statut i Program Društva i brinu za njihovo ostvarivanje.

Član 15.

Počasni član Društva može biti svako fizičko koje značajno doprinosi širenju i unapređivanju fizike i njenih primjena u Bosni i Hercegovini.

Počasni članovi Društva mogu biti i strani državljani . Počasni članovi Društva imaju pravo sudjelovanja u radu Skupštine Društva.

Član 16.

Članom Društva postaju lica koja prihvate Statut i Program Društva , potpišu pristupnicu i izda im se iskaznica Društva.

Strani državljani mogu biti primljeni u članstvo Društva pod uslovima iz prethodnog stava.

Član 17.

Međusobni odnosi članova Društva su zasnovani na ravnopravnosti, zajedničkoj aktivnosti i odgovornosti u ostvarivanju zadataka i izvršenju poslova koji proističu iz zajedničkih Programskih ciljeva.

Članovi Društva imaju prava, dužnosti i odgovornosti da :

- ◆ rade na ostvarivanju zadataka Društva;
- ◆ aktivno učestvuju u radu organa Društva u koje budu birani;
- ◆ da u svom radu polaze od dogovorom utvrđenih stavova i zadataka Društva;
- ◆ predlažu, biraju i budu birani u sve organe Društva;
- ◆ daju inicijativu i prijedloge za aktivnosti Društva;
- ◆ iznose probleme sa kojima se susreću u svom radu i da traže odgovarajuću pomoć Društva;
- ◆ ostvaruju kontrolu rada izabranih predstavnika i organa Društva;
- ◆ redovno plaćaju članarinu.

Član 18.

Članstvo Društva prestaje istupanjem, neplaćanjem članarine i isključenjem. Odluku o isključenju donosi Skupština Društva na prijedlog Upravnog odbora Društva u slučaju kada se utvrdi da član Društva svojim svjesnim djelovanjem direktno šteti vitalnim interesima Društva.

IV ORGANIZACIJA DRUŠTVA

Član 19.

Organi Društva su :

1. Skupština Društva,
2. Upravni odbor,
3. Nadzorni odbor,

Član 20.

Organi Društva se u svom radu rukovode principima kolektivnog rada i lične i kolektivne odgovornosti. Mandat svim organima Društva traje dvije godine, sa mogućnošću obnavljanja mandata za još jedan mandatni period.

1. Skupština Društva

Član 21.

Skupština Društva je najviši organ Društva i održava se po potrebi i odluci Upravnog odbora, a najmanje jedanput godišnje.

Skupštinu čine svi članovi Društva.

Član 22.

Skupština radi u sjednicama.

Radom Skupštine rukovodi radno predsjedništvo.

Rad Skupštine reguliše se poslovníkom kojeg usvaja Skupština na početku rada.

Član 23.

Skupština Društva u svojoj nadležnosti donosi:

- ◆ Statut Društva i njegove izmjene i dopune, te daje tumačenje Statuta,
- ◆ Program rada Društva,
- ◆ Poslovnik o radu Skupštine,
- ◆ Pravilnik o nagradama i priznanjima,
- ◆ Odluku o imenovanju počasnih članova Društva
- ◆ Odluku o prestanku rada Društva.

Član 24.

Skupština Društva u svojoj nadležnosti bira:

- ◆ Upravni odbor, predsjednika i potpredsjednike Društva i članove Nadzornog odbora,
- ◆ predsjednika Skupštine Društva,
- ◆ po potrebi i druge organe i radna tijela Društva.

Član 25.

Predsjednik Skupštine Društva se bira tajnim glasanjem na mandat od dvije godine.

Za predsjednika je izabran onaj kandidat koji ima najmanje za jedan glas više od polovine glasova od broja prisutnih delegata Skupštine.

Član 26.

Skupština punovažno odlučuje ako je sjednici prisutno više od polovine delegata.

Skupština donosi odluke većinom glasova prisutnih delegata.

Za odlučivanje o prestanku rada Društva potrebna je dvotrećinska većina članova Društva.

2. Upravni odbor

Član 27.

Upravni odbor je izvršni organ Skupštine Društva.

Broj članova Upravnog odbora je 17 (sedamnaest).

Broj članova i način izbora Upravnog odbora utvrđuje Skupština svojom odlukom, vodeći računa o regionalnoj zastupljenosti, pokrivenosti svih nivoa obrazovanja, obimu obaveza i drugo.

Član 28.

Predsjednik Upravnog odbora Društva predstavlja i zastupa Društvo i njegove organe, rukovodi radom sjednica Upravnog odbora i do izbora radnog predsjedništva

rukovodi radom Skupštine, koordinira rad organa Skupštine, brine se o pripremama sjednica Skupštine i sprovođenju njenih stavova i zaključaka.

Predsjednik Upravnog odbora Društva je ujedno i predsjednik Društva.

Upravni odbor Društva ima tri potpredsjednika koje bira Skupština Društva.

U slučaju spriječenosti predsjednika Upravnog odbora Društva zamjenjuje jedan od potpredsjednika Upravnog odbora.

Član 29.

Upravni odbor u svojoj nadležnosti :

- ◆ organizuje sprovođenje odluka, zaključaka i stavova Skupštine,
- ◆ saziva i priprema sjednice Skupštine i predlaže dnevni red,
- ◆ vrši popunu članova do jedne trećine,
- ◆ bira sekretara i blagajnika Društva,
- ◆ bira predsjednika i članove komisija Društva,
- ◆ donosi odluku o visini članarine,
- ◆ donosi poslovnik o svom radu,
- ◆ imenuje predsjednike komisija i po potrebi bira predstavnike u druge organe i organizacije,
- ◆ donosi odluke o troškovima službenih putovanja i službenih dnevnica,
- ◆ određuje naredbodavca za finansijsko poslovanje Društva i utvrđuje njegova ovlaštenja,
- ◆ imenuje lica za raspolaganje sredstvima na žiro računu i računima fondova,
- ◆ razmatra godišnji izvještaj o radu i poslovanju komisija i sekcija Društva,
- ◆ razmatra i usvaja programe rada komisija i sekcija i donosi operativni godišnji program rada Društva,
- ◆ izvršava i druge zadatke po ovlaštenjima Skupštine i zahtjevima nadležnih organa.

Član 30.

Upravni odbor radi u sjednicama.

Sjednice se sazivaju po potrebi a najmanje dvaput godišnje.

Upravni odbor punovažno odlučuje ako sjednici prisustvuje više od polovine članova Upravnog odbora.

Odluke se donose dvotrećinskom većinom glasova prisutnih članova.

Član 31.

Upravni odbor bira sekretara i blagajnika Društva sa mandatom na dvije godine, sa mogućnošću još jedne obnove mandata.

Djelokrug rada sekretara i blagajnika Društva utvrđuje se Poslovníkom o radu Upravnog odbora.

3. Nadzorni odbor

Član 32.

Nadzorni odbor ima predsjednika i dva člana koje bira Skupština Društva. Članovi Nadzornog odbora ne mogu istovremeno biti članovi Upravnog odbora. Nadzorni odbor kontrolira materijalno-financijsko poslovanje Društva, sprovođenje odluka Upravnog odbora Društva i o tome redovno informira članstvo i organe Društva.

Nadzorni odbor donosi Poslovnik o svom radu.

Član 33.

Upravni odbor po potrebi obrazuje stalne i povremene komisije i druga svoja radna tijela.

Djelokrug, način rada i sastav komisija i drugih radnih tijela regulira se poslovnikom o radu Upravnog odbora.

V PREDSTAVLJANJE I ZASTUPANJE DRUŠTVA

Član 34.

Društvo predstavlja i zastupa predsjednik Društva. U slučaju njegove spriječenosti Društvo zastupa ovlaštenu potpredsjednik Društva.

VI JAVNOST RADA DRUŠTVA

Član 35.

Rad Društva je javan.

Javnost rada obezbjeđuje se :

- ◆ javnim održavanjem sjednica svih organa Društva,
- ◆ predavljanjem izvještaja o radu, financijskog plana, završnih računa i drugih dokumenata organa Društva članovima Društva,
- ◆ obezbjeđivanjem prava svih članova Društva da po svim razmotrenim pitanjima javno iznose svoje mišljenje, kritiku i prijedloge za njihovo rješavanje,
- ◆ redovnom saradnjom sa sredstvima javnog informisanja

VII FINANSIRANJE I IMOVINA DRUŠTVA

Član 36.

Sredstva za finansiranje djelatnosti Društva obezbjeđuju se iz:

- ◆ članarine, priloga i poklona,
- ◆ doprinosa pravnih lica,
- ◆ od sredstava donacija, sponzorstva, redovnih i drugih članova,
- ◆ i drugih izvora u skladu sa zakonom.

Član 37.

Godišnja članarina za redovne članove uplaćuje se do 15. juna tekuće godine, a odluku o visini članarine donosi Upravni odbor Društva.

Novi članovi Društva plaćaju puni iznos godišnje članarine i to u roku od 15 dana od dana potpisivanja pristupnice.

Član 38.

Sredstva Društva mogu se koristiti samo za ostvarivanje programskih ciljeva i zadataka Društva, a na osnovu Programa rada Društva i utvrđenih finansijskih planova te pozitivnih zakonskih propisa.

Član 39.

Sopstvenim prihodom Društvo samostalno raspolaže preko svojih žiro računa na način utvrđen odlukama Upravnog odbora Društva u skladu sa zakonom.

Član 40.

Naloge za utrošak sredstava Društva potpisuje predsjednik Upravnog odbora Društva ili ovlašteni potpredsjednik i lica koja prema potrebi ovlasti Upravni odbor.

Član 41.

Društvo može imati u vlasništvu nepokretnu i pokretnu imovinu. Imovinom u vlasništvu Društva upravlja Upravni odbor.

VIII SARADNJA SA DRUGIM UDRUŽENJIMA, ORGANIZACIJAMA I ORGANIMA

Član 42.

Društvo u ostvarivanjima programskih ciljeva saraduje sa organizacijama koje imaju iste ili slične ciljeve, državnim, kantonalnim i drugim organima, pedagoškim zavodima, školama, univerzitetima, te odgovarajućim naučnim, stručnim i privrednim subjektima.

Društvo u okviru svojih prava i dužnosti saraduje i razvija odnose sa sličnim organizacijama u drugim državama u skladu sa Ustavom, zakonom i međunarodnim ugovorima.

Član 43.

Društvo može biti član evropskih i svjetskih asocijacija fizičara i drugih odgovarajućih međunarodnih udruženja i organizacija.

IX PRELAZNE I ZAVRŠNE ODREDBE

Član 44.

Društvo nastavlja isti i sličan rad Društva fizičara Bosne i Hercegovine i preuzima sva prava i obaveze svog prethodnika.

Član 45.

U slučaju prestanka rada Društva , imovina će se predati Odsjeku za fiziku Prirodno-matematičkog fakulteta u Sarajevu, s tim da je on preda organizaciji koja bude osnovana sa istim ili sličnim ciljem.

Ukoliko organizacija iz prethodnog stava ne bude formirana ,o imovini odlučuje Skupština Društva , koja donosi odluku o prestanku rada.

Član 46.

Izmjene i dopune ovog statuta donose se po postupku za njegovo donošenje.

Član 47.

Tumačenje odredaba ovog statuta daje Skupština Društva.

Član 48.

Ovaj statut stupa na snagu danom donošenja.